



Farqona haqiqati

Ijtimoiy-siyosiy, ma'naviy-ma'rifiy gazeta



<http://farhaqiqat.uz/>



t.me/farhaqiqati

Фараҳбахш кунлар муборак!



Убайдуллоҳ АБДУЛЛАЕВ,
Фарғона вилояти бош имом-хатиби

Яқиндагина интиқлик ила кутганимиз Рамазон ойи охирлаб қолди. Бу муборак ойнинг илк кунидан бошланган хатми Қуръонлар улуг кечада итмомига етди.

Юртимизнинг 1500 дан зиёд масжидларида, жумладан, вилоятимиздаги 194 та жомеда ўтказилган хатми Қуръонлар Қадр кечасида ниҳояланди. Юртимиз бўйлаб бир вақтда яқунланган Каломуллоҳ хатми сўнггида мўмин-мусулмонлар бир пайтнинг ўзида дуога қўл очдилар. Уламолар, аҳли илмларнинг маърифий суҳбатлари буюк кечанинг файзига файз қўшди. Хатми Қуръонларнинг 27 кунлик тажрибасидан ёшу қари бирдек қувонгани, халқимизга бу тадбир манзур бўлганини мамнуният билан тилга олиш мумкин.

Кўзларда ёш, қалблар Аллоҳга боғланган ҳолда дуога кўтарилган қўллар ила мўмин-мусулмонлар ватани ва дини ривожини, халқи ва оиласи фаровонлигини, икки дунё саодатини сўраб илтижо қилдилар. Илоҳо, улуг кечаларда Аллоҳнинг байтида туриб қилинган дуолар ижобат бўлсин!

“Яхши кунлар тез ўтади”, дейишади. Жонажон диёримизнинг мўмин-мусулмонлари

ўн икки ойнинг султони бўлмиш Рамазон ойини ниҳоятда кўтаринки руҳда, кечаларини тоат-ибодат, кундузларини рўздор ҳолда файзу футуҳ билан ўтказиб, бу ойни солиҳ амаллар ва Аллоҳ розилиги йўлидаги ибодатлар ойига айлантирдилар. Алҳамдулиллаҳ, Аллоҳ таоло ваъда қилган буюк мукофотни қабул қилиш куни “Ийди-Фитр”, яъни Рамазон ҳайити каби улкан шодиёнани ҳам интиқлик ила кутмоқдалар.

Аллоҳ таоло Узининг муборак Каломида шундай марҳамат қилган: “Айтинг: Аллоҳнинг фазли ва раҳмати билан, бас (албатта) шулар сабабли (мўминлар) шодлансинлар! У тўплаган нарса (бойлик)ларидан яхшироқдир” (Юнус сураси, 58-оят).

Анас розияллоху анҳудан ривоят қилинади: “Набий соллаллоху алайҳи васаллам Мадинага келганларида, у (Мадиналик) ларнинг икки куни бўлиб, улар ўша кунларида ўйин-кулги қилишар эди. Пайғамбаримиз соллаллоху алайҳи васаллам: “Бу икки кун қандоқ кун?”, деб сўрадилар. Улар: “Биз жоҳилиятда шу кунларда ўйин-кулги қилар эдик”, дейишди. Шунда

Расулulloҳ соллаллоху алайҳи васаллам: “Албатта, Аллоҳ сизларга у иккиси ўрнига улардан кўра яхшироқ – Азҳо (Қурбон ҳайити) ва Фитр (Рамазон ҳайити) кунларини берди”, дедилар (“Сунан” эгалари ривоят қилган).

Халқимиз қадимдан, Исломи дини билан мушарраф бўлган кундан бошлаб Рамазон ҳайити кунини тантанали равишда байрам қилиб нишонлаб келган. Ийд намозини ўқиш учун бутун шаҳар аҳли бир намозгоҳга йиғилган.

Шунингдек, ҳайит кунлари бева-бечоралар ҳолидан хабар олиш, фақир камбағалларга моддий ёрдам кўрсатиш, болаларга ҳайитлик совғалари улашиш халқимиз ичида анъанага айланган.

Абу Ҳурайра розияллоху анҳудан ривоят қилинган ҳадисда Расулulloҳ соллаллоху алайҳи васаллам: “Ким бир мўминнинг дунё қайғуларидан бирини кетказса, Аллоҳ унинг қиёмат кунидаги қайғуларидан бирини кетказди. Ким дунёда бир қийналган (биродари)нинг оғирини енгил қилса, Аллоҳ таоло унинг қиёматдаги оғирини енгил қилди. Ким бир мусулмоннинг ай-

бини беркитса, Аллоҳ таоло уни дунё ва охиратда сатр қилади. Қайси бир банда биродарининг ёрдамида бўлса, Аллоҳ таоло ҳам унинг ёрдамида бўлади”, деганлар (Имом Муслим ривояти).

Шунингдек, ҳайит арафасида кўни-кўшнларга меҳр-мурувват кўрсатиш билан бирга, моддий ёрдамга муҳтож кишилар, яъни кам таъминланган оилаларга хайр-эҳсон қилинса, уларнинг хонадонларига ҳам байрам шукҳи кириб келган бўлади.

Шу ўринда эсга олиш лозим бўлган яна бир жиҳат, “Фитр садақаси” рўзадан чиқиш муносабати билан бериладиган садақа ҳисобланади. Бу молиявий ибодат шариятимизда рўздорнинг рўзаси комил бўлишига халал берадиган турли беҳуда гап-сўз ва хатти-ҳаракатлардан поклаш ва мискинларга таом бўлиш маъносидан жорий қилинган.


Ҳанафий мазҳабига кўра, Рамазон ҳайити куни тонги отиши билан “Садақаи фитр”ни бериш

вожиб бўлади. Аммо ундан олдин Рамазоннинг аввалги кунларида бериш ҳам жоиз ҳисобланади. “Фитр садақаси”ни бериш туфайли камбағалларнинг хонадонларига ҳам хурсандчилик улашилган бўлади.

Шунингдек, узоқлашиб кетган қариндошлар билан, айрим аразлашган дўст-яқинлар билан ҳайит баҳонасида алоқаларни тиклаш, ярашиб олиш лозим. Зеро, силаи раҳмини узган ёки мусулмон биродарига гина қилган кишиларга фазилатли кунларнинг яхшилиги етмаслиги ҳақида ривоятлар бор. Шу боис, бунга жиддий қараш керак. Бундай ҳолатларда ҳайитликлар бериш ҳам орадаги қудуратни кўтарилишига сабаб бўлади.

Аллоҳ таоло барчамизга Рамазон ҳайитини муборак қилсин. Бу кунни баракотидан савобли амалларни кўпайтиришни Яратганининг ўзи насиб айласин. Барчамизга Рамазон ҳайити муборак бўлсин!

O'ZBEKISTON RESPUBLIKASI
REFERENDUMI
2023




2 БЕТ

ХАЛҚ

ДЕМОКРАТИЯСИ

“Boeing”лар Ўзбекистон ёнилғисидан ўқайди



3 БЕТ



МАҚСАД – АҲОЛИНИНГ
УЙ-ЖОЙГА БЎЛГАН
ТАЛАБИНИ ҚОНДИРИШ

6 БЕТ

O'ZBEKISTON RESPUBLIKASI
REFERENDUMI
2023

30 АПРЕЛЬ – ЎЗБЕКИСТОН РЕСПУБЛИКАСИ
РЕФЕРЕНДУМИ КУНИ

ХАЛҚ ДЕМОКРАТИЯСИ

Муҳаммаджон ОБИДОВ,
Ўзбекистонда хизмат кўрсатган журналист

Касб тақозоси билан дунёнинг қўллаб мамлакатларида бўлдим. У ёқларда оддий одамлардан то давлат, ҳукумат арбобларигача учрашди, мулоқотда бўлиш насиб этди. Лекин сўз эркинлиги, миллий валютани эркин айирбошлаш, пахта етиштиришда мажбурий меҳнат мавзуси очилганида ўзимизни оқлашга баҳона излардик.



Бизда цензура – қонун тақиқланган, конвертация бор, фақат уни Вазирлар Маҳкамаси назорат қилиб туради, холос. Пахта теришга ихтиёрий ҳашарга чиқилади, дея ўзимиз ишонмаган ақидага уларни ишонтирмақчи бўлар эдик. Ҳолбуки, ОАВ доимо назоратда, тадбиркор белгиланган тартибда сўмни конвертация қилиб, четдан бирор технология сотиб олиши деярли мумкин эмаслигини, ҳатто мактаб ўқувчилари ҳам пахта теримига мажбуран жалб этилишини билардик. Аммо... амал, мукофот, “қулоғи тинчлик”, деган тушунчалар оҳанрабошидан воз кечиб, бу ҳақда очиқ-ойдин гапирган, амалдаги қонунлар ижросини талаб қилганлар жуда-жуда озчилик бўлди.

Олий Мажлис депутати сифатида қабул қилинаётган қонун лойиҳасига ўзгартириш киритиш ҳақида эркин таклиф беролмаган кунлар ёдимиздан чиққани йўқ. Балки ўзи шундай бўлиши керакдир, дея баъзан ўзимизга таскин бердик, баъзан эса бу ҳақда фикр айтишга кўрқдик.

Бугун мамлакатимиз ҳар жабҳада ўзгаришга юз тутди. Ўзбекистон ёпиқ давлат, деб келган хориждаги муҳолифатчилар ҳам юртимиздаги, аввало, сиёсий, кейин иқтисодий эркинлик ва ислохотларни тан олмоқда, қўллаб-қувватлаяпти. Ўзбекистон халқаро ҳамжамият ўртасида расман “тез ривожланаётган давлат”лар қаторига киритилди. Президентимиз фаолияти эса шу ислохотлар муаллифи ва ташаббускори сифатида юксак баҳоланяпти.

Мамлакатда рўй берган очиқлик, адолат, инсон қадрини улуғлаш мезонларидаги ўзгаришларни ҳар бир фуқаро ўз тақдирида сеза бошлади. Камбағаллик даражаси, ишсизлик каби жиддий муаммолар энг юқори минбарларда муҳокамага қўйилмоқда ва ечими юзасидан амалий дастурлар қабул қилиняпти, ижроси дав-

лат тузилмалари, жамоатчилик томонидан доимий назоратда. Муаммони ҳал этишнинг “Темир дафтар”, “Аёллар дафтари”, “Ёшлар дафтари” каби бизга номаълум услублари қўллана бошланганида уни англаш, қабул қилиш қийин бўлганди. Бугун билдикки, булар халқ турмуш даражасини яхшилашга қаратилган энг самарали амалиёт экан.

Икки ой илгари Москвада бўлиб ўтган журналистларнинг халқаро анжуманида қатнашдим. Унда таниқли сиёсатчилар, давлат арбоблари, хусусан, Россия Президентининг собиқ давлат маслаҳатчиси, ҳозирда Россия медиаиндустрия академияси раҳбари, сиёсатшунос, профессор Евгений Дугин ҳам иштирок этди.

Ўша даврада Ўзбекистонда рўй берган демократик ислохотлар тилга олинди. Евгений Дугиннинг менга берган интервьюсидан иқтибос келтирмақчиман.

– **Ўзбекистонда амалга оширилаётган иқтисодий-ижтимоий ислохотларнинг айрим ибратли жиҳатларини алоҳида таъкидламоқчиман,** – деди сиёсатшунос олим ва давлат арбоби. – **Биринчидан, Ўзбекистонда тадбиркорларга эркинлик берилиши натижасида**

сўнги беш йил мобайнида иқтисодий юксалиш рўй берди. Иккинчидан, ҳокимиятга ишонч ҳар қандай муаммони ҳал қилувчи омилдир. Мамлакатингизда тадбиркор ҳам, бошқа соҳа вакиллари ҳам давлатга ишонади.

Менга Ўзбекистон Президенти ташаббуси билан ташкил этилган Халқ қабулхоналари тизими йўлга қўйилгани маълум. Халқ қабулхонаси – халқ демократиясининг маъно ва моҳияти дегани. Инсон, у узоқ қишлоқда яшайдими ёки шаҳардами, Халқ қабулхонасига келиб билдирган фикри инobatга олинади. Бу мулоқот демократиясининг шаклидир. Унга кўра одамлар, яъни халқ ўз муаммо ва мулоҳазасини билдиради, йиғилган таклиф ва истаклар умумлаштирилади, таҳлил қилинади. Кейин эса у халқ турмуш тарзи, мамлакат раҳбарияти учун қонунга айланади. Яъни, Президент халқ билдирган таклиф ва талаб асосида қонун қабул қилинишини таъминлайди. Тегишли фармонлар чиқаради.

Энг эътиборли ҳолат, бу – қонун ва фармонлар халқ истаги сифатида қабул қилинади. Бундан шундай хулоса чиқадики, одамлар энди ўзлари истаган қонунлар асосида яшайди. Президент эса халқ идорасини янада кучайтириб, бунинг фармонларида акс эттиради.

Мен Россия Федерацияси Федерал Мажлиси Федерация Кенгаши Раиси Валентина Матвиенко ҳузуридаги экспертлар кенгаши аъзосиман. Кенгаш қонунлар ҳаётга қанчалар татбиқ этилаётганини ўрганади. Аммо бу қонунлар халқдан келиб чиққан, дея олмайман. Ўзбекистондаги ҳолатда эса тўғридан-тўғри халқ демократияси шакли

яратилган. Шу боис, **биз Ўзбекистон Президенти Шавкат Мирзиёев ҳақиқатан халқ демократиясини қарор топтира олгани билан фахрланамиз. Бу ҳар қандай давлат раҳбари учун юксак шараф.**

Дунё сиёсатдонлари орасида ижтимоий таҳлиллари билан танилган инсоннинг Ўзбекистондаги ислохотлар ва унинг ташаббускорига берган юксак баҳоси қалбимни ғурур-ифтихорга тўлдирди. Нега фахрланмай, ахир у менинг Ватанимда қарор топаётган демократик тамойилларни тан олиб, барча давлат раҳбарлари ҳам бу каби ислохотларни ирода қилолмайди, демоқда-ку?

Шу ўринда яқинда Фарғона тумани Чимён қишлоғилик бир оқсоқол билан бўлган суҳбатимиз ёдга тушди.

– Мен оддий колхозчи оиласи фарзанди эдим. Бир умр мактабда муаллимлик қилдим, – дейди Хусан ота Қурбонов. – Нафақага чиққунимча ҳам туман раҳбари билан юзма-юз мулоқотда бўлмаганман. Вилюят, мамлакат миқёсидаги раҳбарларни-ку, қўя туринг. Президентимиз 2021 йил Фарғонадаги сайловолди учрашувида ўз режаларини баён қилгач, энди сизлардан эшитмоқчиман, деб қолди.

Тушуншимча, бундай анжуманларда давлат раҳбари билан мулоқотда бўладиганлар аввалдан аниқланар ва тайёрланар эди. Биз Фарғона тумани ҳокимлиги залидан видеоалоқа орқали тўғридан-тўғри қатнашаётган эдик. Президентнинг қақирғидан руҳланиб, микрофон олдига бордим. Бунинг кўриб турган давлатимиз раҳбари, марҳамат, гапиринг, отахон, деди. Ростини, бир оз ҳаяжонландим. Кейин кўнглимдаги гапларни тўкиб солдим. Қишлоғимиз муаммолари ва ўқитувчиларни қўллаб-қувватлашни давом эттириш масаласида таклифлар киритдим.

Биласизми, Президент ҳар бир гапимни ёзиб оларди ва охирида таклифларингиз учун раҳмат сизга, деди. Ўша кунлари Чимён “Обод қишлоқ” дастурига киритилди. Молия, солиқ, иқтисод, таълим идоралари вакиллари келиб, менинг таклифларим бўйича батафсил суҳбатлашди. Тез фурсатда мамлакат миқёсида амал қилувчи меъёрий ҳужжатлар, ҳукумат қарорлари қабул қилинди. Уларни тузиш, белгилаш жараёнида мен ҳам иштирок этганимдан ғурурланаман. Очиғи, айрим таклифларим инobatга олингани ҳамон ҳайратдаман. Ахир, мен олис қишлоқ мактабининг собиқ ўқитувчиси, ҳозирда оддий пенсионерман, холос! Ё

демократия, очиқлик, ошқоралик, дегани шумикан?!

Бу икки эътироф, ҳаётини воқеа, аслида, бугунги Ўзбекистоннинг асл қиёфасидир. “Халқ давлат учун эмас, давлат халқ учун”, “Давлат – жамият – инсон” эмас, “Инсон – жамият – давлат” каби мезон-меъёрлар сиёсат ва ижтимоий ҳаётдаги туб бурилишлардир.

Узоқ йиллик журналистлик тажрибасига эга инсон сифатида айтмай: ОАВда сўз эркинлиги, фикрлар хилма-хиллиги учун шароит яратилди. Энди асосли таҳлилга таянган танқид учун давлат идоралари таъкиб ва таъийқ қилолмайди.

Жойлардаги ҳамон эскича фикрлайдиган айрим ҳоким, амалдорларни ҳисобга олмаганда, албатта. Матбуотда хусусий тармоқ тобора кенгайиб бормоқда. Ўзим мисолимда айтсам, Президентимизнинг 2020 йил 27 октябрдаги “Давлат иштирокидаги корхоналарни ислоҳ қилишни жадаллаштириш ҳамда давлат активларини хусусийлаштиришга оид чора-тадбирлар тўғрисида”ги Фармонида кўра, илгари Фарғона вилояти ҳокимлиги муассислигида бўлган “Фарғона ҳақиқати” – “Ферганская правда” газеталари юздан ортиқ газета, журнал, нашриётлар қатори давлат тасарруфидан чиқарилиб, хусусийлаштирилди. Бу ҳам сўз эркинлиги томон қўйилган муҳим қадам, давлат раҳбарининг сиёсий иродаси намойиши эди.

Ҳа, ҳаёт тарзимиз ўзгарди ва унинг бош ислохотчиси Ўзбекистон Президенти Шавкат Мирзиёев эди. Янги таҳрирдаги Конституциямиз учун 30 апрель куни бўладиган референдумда халқимиз яқдиллик билан овоз беришини изҳор қилмоқда. Бу ҳақида танишим, Чимён қишлоғилик Хусан ота ҳам алоҳида таъкидлади.

– Оилавий даврамизда фарзанд, набираларимиз билан Конституция лойиҳасини ўрганиб, муҳокама қилдик, – дейди отахон. – Барчамиз биринчилардан бўлиб овоз бергани боришга қарор қилдик. Чунки бу Конституция Ўзбекистонда чинакам демократия, халқ демократиясини янада мустаҳкамлайди.

Қизиқ, нега энди Хусан ота ҳам, дунёнинг таниқли сиёсатдонлари ҳам Ўзбекистондаги ижтимоий-сиёсий, иқтисодий ислохотлар ҳақида бир хил фикрлайдиган бўлиб қолди?


“Янги Ўзбекистон” газетасининг 2023 йил 19 апрелдаги 75-сонидан олинди.



ПРЕЗИДЕНТИМИЗНИНГ 2020 ЙИЛ 27 ОКТАБРДАГИ “ДАВЛАТ ИШТИРОКИДАГИ КОРХОНАЛАРНИ ИСЛОҲ ҚИЛИШНИ ЖАДАЛЛАШТИРИШ ҲАМДА ДАВЛАТ АКТИВЛАРИНИ ХУСУСИЙЛАШТИРИШГА ОИД ЧОРА-ТАДБИРЛАР ТЎҒРИСИДА”ГИ ФАРМОНИГА КЎРА, ИЛГАРИ ФАРҒОНА ВИЛОЯТИ ҲОКИМЛИГИ МУАССИСЛИГИДА БЎЛГАН “ФАРҒОНА ҲАҚИҚАТИ” – “ФЕРГАНСКАЯ ПРАВДА” ГАЗЕТАЛАРИ ЮЗДАН ОРТИҚ ГАЗЕТА, ЖУРНАЛ, НАШРИЁТЛАР ҚАТОРИ ДАВЛАТ ТАСАРРУФИДАН ЧИҚАРИЛИБ, ХУСУСИЙЛАШТИРИЛДИ. БУ ҲАМ СЎЗ ЭРКИНЛИГИ ТОМОН ҚЎЙИЛГАН МУҲИМ ҚАДАМ, ДАВЛАТ РАҲБАРИНИНГ СИЁСИЙ ИРОДАСИ НАМОЙИШИ ЭДИ.

“Boeing”лар Ўзбекистон ёнилғисидан учади

Фарғона нефтни қайта ишлаш заводи ўтган асрнинг эллигинчи йиллари ўз фаолиятини бошлаган. Шундан буён у Ўзбекистондаги энг йирик ишлаб чиқариш корхонаси мақомида эди. Аммо йиллар ўз таъсирини кўрсатди. Қурилмалар яроқлилик муддати ўтгани учун доимо таъмирлаш, модернизацияга муҳтож бўлди.



Бу ерда катта миқёсдаги иш – ёнилғи таркибидаги олтин-гургуртни тозалаш қурилмаси бунёд этилганига ҳам йигирма йилдан ошди.

Нефтни қайта ишлаш технологиялари такомиллашиб борапти, маҳсулот сифатига талаб ошмоқда. Шунинг учун ҳам Фарғонада Президент ва ҳукумат қарорлари асосида кенг кўламда ишлаб чиқариш технологияси модернизация қилинапти. Франция, Италия, Англия давлатлари мутахассислари лойиҳаси ва усқуналари иштирокида нефтдан маҳсулотлар олишда энг зарур бўлган водородни бойитиш ва водород ишлаб чиқариш қурилмаси янгитдан бунёд этилмоқда.

– Бу қурилмалар ишга тушганда 99,9 фоиз водород билан таъминлайди завод қурилмаларини, – дейди лойиҳаларни бошқариш департаменти бошлиғи ўринбосари Йўлдошали Мирзакаримов. – Изомеризация қурилмасида евро талабига жавоб беридиган 92, 95 маркали бензин маҳсулотлари ишлаб чиқарилади. Гидрокрекинг қурилмасида синтетик, яримсинтетик мой маҳсулотлари API (American Petroleum Institute) II/III-гурухга мансуб мой маҳсулотлари ишлаб чиқариш имкониятини яратади ҳамда JEAT-1 авиакеросини, бензин, дизель ёнилғилари қўшимча ишлаб чиқарилади.

Маълумки, ҳозиргача нефтни қайта ишлаб, ундан юз фоиз маҳсулот олиш мумкин эмасди. Аниқроғи, нефтдан турли қолдиқлар ажраб чиқар эди. Мутахассислар энди гидрокрекинг технологиясини жорий этмоқдалар.

– Гидрокрекинг қурилмасининг афзаллиги завод қурилмаларида ишлаб чиқилган қолдиқ маҳсулотларини қайта ишлаб, қўшимча қиймат берувчи маҳсулотга айлантиради. Маҳсулот тури ҳамда сифати ошади. Шу қурилма ишга тушиши билан завод йилига 2 миллион тонна хомашёни қайта ишлаш имкониятига эга бўлади, – дейди Йўлдошали Мирзакаримов.

Нефтни қайта ишлаш бўғисиз мумкин эмас. Ҳозиргача у иссиқлик электр станциясидан олинар эди. Бу масала ҳам ечимини топяпти. Заводда 100 ва 25 тонналик учтадан, жами 6 та буг қозонхоналари қурилмоқда. Унга самарадор Италия буг қозонлари олиб келинди. Унинг афзаллиги шундаки, дастлаб сувни кимёвий тозалайди, яъни чучуклаштиради. Бундай сувдан олинган буг қувурларни чиритмайди.

Мутахассисларнинг айтишича, энди буг қозонларига газ эмас, балки заводнинг ўзидан чиқадиغان мазут ёқилади.

Ўн йиллар давомида сифимларда



эррозия рўй бера бошлади. Бу табиий ҳол эди. Завод мутахассислари 60 минг кубметрлик янги сифимларни монтаж қилишмоқда. Булар ҳам одадий сифим эмас. Агар мавжуд сифимларда сақланаётган нефть маҳсулоти қисман ҳавога буғланиб чиқса ва табиатга маълум даражада зарар етказса, бу – янги сифимларда инновацион ечимлар қўлланган. Яъни, улар ҳаво ҳароратига қараб нафас олади ҳамда табиатга мутлақо чиқит чиқармайди.

Баҳорнинг шуқуҳли кунларида фарғоналик мутахассислар яна бир улкан ютуқни қўлга киритдилар. Энди



нефтни қайта ишлаш заводида энг юқори сифатли авиаёнилғи ишлаб чиқарилади.

– Бу иш ўн йил давомида амалга оширилди. Устозларимизнинг жуда катта меҳнати сингиган. 3 миллион АҚШ доллари ўзлаштирилди. Бу эришилган ютуқ нафақат заводники, балки республикамизнинг катта ютуғи деб ҳисоблайман, – дейди директор ўринбосари Иқболжон Раҳимов.

Шу ўринда икки жиҳатни алоҳида таъкидлаш лозим. Ўзбекистоннинг туризм салоҳияти кун сайин ошиб бормоқда. Президент топшириғи билан ички ва халқаро авиақатновлар сони икки баробар оширилдиган, бунинг учун янги замонавий самолётлар сотиб олинадиган бўлинди. Уларга эса камида “Евро-5” сифатидаги ёнилғи керак бўлади. Бу масала Фарғонада ҳал этилди.

– Сифат кўрсаткичлари энг охириги талабларга жавоб беради. “Boeing”, “Airbus” каби замонавий самолётларда фойдаланиш мумкин бу ёнилғидан, – дейди Иқболжон Раҳимов. – Илгари 120 минг тоннагача авиакеросин ишлаб чиқариш мумкин эди. Энди бу миқдорни тўрт баробарга ошириш имкони бор.

Икки муҳим жиҳат шундаки, JEAT-1, яъни авиаёнилғи мутлақо маҳал-



лий хомашё – Ўзбекистон нефтидан олинапти. Бу билан импорт ўрнини босувчи маҳсулот маҳаллийлаштириш дастури асосида ишлаб чиқилишига эришилди.

Яна бир гап. Бугунги ютуққа эришиш йўли осон кечмаган.

– Мен шу заводда 50 йилдан ортиқ ишладим, – дейди меҳнат фахрийси Ҳабибулло Алиев. – 2009-2011 йилларда асосий масала JEAT-1 маҳсулотини ишлаб чиқариш бўлган. Шунинг учун занглас қувурларни қурилмалар, сифимлар, юклаш бўлимларигача тортдик. Лаборатория жиҳозлари олиб келинган. Лекин бу ишларнинг ҳаммаси тўхтаб қолганди. Бугун мени заводга чақиришди. JEAT-1 маҳсулотини ишлаб чиқариш бошланибди. Жуда хурсанд бўлдим бундан. Чунки қилинган ишлар қолиб кетиб, афсусда юргандим. JEAT-1 ни ишлаб чиқариш учун маблағ ажратган давлатимиз, шу ишни охирига етказган шогирдлардан жуда хурсандман.

Ўрни келганда шуни алоҳида таъкидлаш керакки, раҳбарият корхонада ёш, иқтидорли янги замон мутахассисларини бирлаштира олди. Маънан эскирган усқуналар, технологик жиҳозлар ўрнини энг замонавийси эгаллапти.

Ишчи-ходимларнинг ижтимоий муҳофазасига устуворлик берилди. Корхона ҳудудида янги, қулай лойиҳада ечиниш-ювиниш мавзеси ташкил этилди. У сихатгоҳлар каби ободонлаштирилди. Унда узокроқ масофадаги қурилмада ишловчилар учун велосипедлар парки очилди.

Хизмат кийимлари илгари сотиб олинар эди. Энди улар ҳам янги ташкил этилган тикувчилик цехида ишлаб чиқарилмоқда. Бу билан яна 30 нафар ёш чеварлар ишли бўлди.

Ишчилар таомномасида қишин-ёзин энг сара мева ва сабзавотлар бор. Уни ҳам завод ишчилари етиштиради. Бодринг ҳосили иссиқхоналардан ошхонага – ишчилар дастурхонига етказилмоқда.

Завод яқинида тиббий хизмат кўрсатиш ва даволаш маркази ишлаб турибди. Бу ерда ҳам ишчи-хизматчилар саломатлигини муҳофаза қилиш, даволаш учун барча замонавий тиббий жиҳозлар, малакали шифокорлар бор.

Фарғона нефтни қайта ишлаш корхонаси бугун эришаётган натижалар унинг шонли тарихи китобидан унутилмас воқеа сифатида ўрин олиши, шубҳасиз.

**Сарвар ОБИД.
Элёр ОЛИМОВ
олган суратлар.**

"ФАРҒОНА НЕФТНИ ҚАЙТА ИШЛАШ ЗАВОДИ" МЧЖ ЖАМОАСИ

Фарғона вилояти аҳлини, барча мўмин-мусулмонларни, саноат корхоналари ходимлари ва куну тун эл-юрт манфаати йўлида фидокорона меҳнат қилаётган нефтчиларни халқимизнинг эзгулик, хайру саховат ва меҳр-оқибат байрами – муборак Рамазон ҳайити билан самимий табриклайди.



Улуғ айём кунларида қилган эзгу орзуларимиз, тоат-ибодатларимиз ва дуоларимизни Аллоҳ таоло ижобат этиб, эл-юртимизда мустаҳкам қарор топган тинчлик-осойишталик ва

қут-баракани бардавом қилсин!

Барчангизга мустаҳкам сиҳат-саломатлик, тинчлик-хотиржамлик, оилавий бахт-саодат тилаймиз!

РАМАЗОН ҲАЙИТИНГИЗ ҚУТЛУҒ БЎЛСИН!

CENTRAL ASIAN MEDICAL UNIVERSITY

Дунёдаги
жамики мусулмон уммати
учун мўътабар ва қадрли бўлган
улуғ айёмда Ўзбекистон халқини,
вилоятимиз аҳлини, шу жумладан,
тиббиёт ходимларини, олий таълим
муассасаси профессор-ўқитувчиларини
Рамазон ҳайити билан самимий
муборакбод этади.

Муқаддас динимизнинг эзгулик ва
инсонпарварлик, меҳр-шафқат каби
буюк фазилатлари янада ёрқин намоён
бўладиган ушбу шукуҳли дамларда
Сизларга, аввало, сиҳат-саломатлик,
оилавий бахт, хонадонларингизга
файзу барака тилаймиз.

Нияти пок, мақсадлари улуғ халқимизнинг
табаррук кунларда қилаётган
барча ибодатлари, эзгу дуолари
ижобат бўлсин!



**Муқаддас айём –
Рамазон ҳайити
барчамизга муборак
бўлсин!**

Шарҳ

МАҚСАД – АҲОЛИНИНГ УЙ-ЖОЙГА БЎЛГАН ТАЛАБИНИ ҚОНДИРИШ

Мамлакатимизда аҳолини арзон уй-жой билан таъминлаш, бунда давлат бюджети ҳисобидан субсидиялар ажратиш, хусусий пудрат ташкилотларини замонавий кўп қаватли турар жойлар қурилишига жалб этиш бўйича Ўзбекистон Республикаси Президентининг фармон ва қарорлари ижросини изчиллик билан амалга оширишда тижорат банкларининг роли алоҳида аҳамият касб этмоқда.

Вилоятимизда 2023 йилнинг 1 апрель ҳолатига тижорат банкларининг кредит қўйилмалари миқдори 21 трлн. 240 млрд. сўмни ташкил этган бўлса, шундан 3 трлн. 761 млрд. сўми ёки 18 фоизи ипотека кредитлари ҳиссасига тўғри келади. Бу рақамлар вилоятда аҳолининг уй-жойга нисбатан ўсиб бораётган талабини қондиришга катта эътибор қаратилаётганидан дарак беради.

Шуни айтиш керакки, 2020-2023 йиллар мобайнида Фарғона вилоятида аҳолини уй-жой билан таъминлаш мақсадида тижорат банклари томонидан 15 585 нафар фуқарога 2 трлн. 791 млрд. сўм миқдоридagi ипотека кредитлари ажратилди.

Ўзбекистон Республикаси Президентининг 2021 йил 9 декабрь кунги "Бозор тамойилларига асосланган ипотека кредитлари орқали аҳолини уй-жой билан таъминлашга оид қўшимча чора-тадбирлар тўғрисида"ги Фармони асосан 2022 йилда Фарғона вилоятида 3 000 та ипотека кредити ажратиш топшириғи берилган эди.

2022 йилда 6 559 нафар фуқарога барча молиялаш манбалари ҳисобидан 1 трлн. 149 млрд. сўм миқдоридa ипотека кредитлари ажратилиб, 2021 йилга нисбатан 105 фоизга, шундан субсидия асосида 1 903 нафар фуқароларга 420,0 млрд. сўм кредитлар берилиши ҳисобига 2021 йилга нисбатан 134 фоизга кўпайишига эришилди. Фармонда бел-



гиланган топшириқ 219 фоизга ортиғи билан бажарилди.

2023 йилнинг 13 апрель куни Ўзбекистон Республикаси Президенти томонидан "2023 йилда бозор тамойилларига асосланган ипотека кредитлари орқали аҳолини уй-жой билан таъминлаш дастурини амалга ошириш чора-тадбирлари тўғрисида"ги Фармон имзоланди.

Фармонга кўра, Фарғона вилоятида 2023 йилда 4 177 нафар фуқарога 980,2 млрд. сўм миқдоридa ипотека кредитлари ажратилиши, шунингдек, 2 000 нафар фуқарога давлат бюджети ҳисобидан 141,3 млрд. сўм субсидия маблағлари берилиши белгиланди.

Аҳамиятли жиҳати, 2023 йил 1 майдан бошлаб ипотека кредитлари ва субсидияларни ажратиш тартибига ўзгаришлар киритилди. Жумладан:

– эндиликда банкларга ипотека кредитларини расмий даромадга эга бўлмаган жисмоний шахсларга ҳам ажратишга рухсат берилди. Бунда, ушбу фуқароларнинг тўлов қобилияти уларнинг банк картаси айланмаси, ижара, коммунал ва конунчилик ҳужжатларида тақиқланмаган бошқа харажатларини ҳисобга олиш орқали аниқланади;

– банкларга қарз олувчи томонидан тўланган дастлабки бадал миқдори, имтиёзли давр муддати ва бошқа кўр-

саткичлардан келиб чиқиб, субсидияси ажратиладиган ипотека кредитлари бўйича табақалаштирилган фоиз ставкаларини ўрнатиш ҳуқуқи берилди;

– профессионал таълим ташкилотларининг муҳандислик, ишлов бериш ва қурилиш соҳаларидаги махсус фанлар бўйича дарс бераётган ёки ўқув амалиётини ўтказаётган ўқитувчилари ва ишлаб чиқариш таълим усталарига имтиёзли шартларда субсидия хабарномаларини бериш тартиби жорий этилади;

– субсидияга ажратилган маблағларни тезроқ ишлатиш учун субсидия хабарномасининг амал қилиш муддати 12 ойдан 4 ойга туширилди. Бунда, фуқаро 4 ойда хабарномадан фойдалана олмаса, у субсидияга қайта ариза топшириши мумкин бўлади.

2023 йил учун ипотека кредитлари бўйича субсидиялар ажратишга доир аризалар тасдиқланган параметрлар доирасида 2023 йил 1 майдан 2023 йил 1 декабрга қадар қабул қилинади.

Ипотека бозорини узоқ муддатли ресурслар билан таъминлаш ҳамда уй-жой қурилишини тезлаштириш мақсадида Тикланиш ва тараққиёт жамғармасидан 100 миллион АҚШ доллари миқдоридagi маблағлар ажратилиши белгиланди. Ушбу маблағлар ҳисобидан банклар қурилиш-пудрат ташкилотларига 18

ойгача бўлган муддатга Марказий банкнинг асосий ставкасига тенг фоиз ставкасида (бугунги кунда 14 фоиз) кредитлар ажратилади.

Қурилатган кўп квартирали уй-жойларнинг яқунланган қисмини (қаватларини) банклар томонидан кредит таъминоти сифатида босқичма-босқич гаровга олиш амалиёти жорий этилди. Бугунги кунга қадар уй-жойнинг томи ёпилганидан кейин уни гаровга қўйиш ва кредит олиш мумкин эди. Ушбу Фармон билан киритилган ўзгаришлар сабабли пудрат ташкилотларининг гаров таъминотида боғлиқ масалаласи ҳал этилиши билан бир қаторда, сотилган уйлардан тушган маблағлар тўлиқ банк ҳисобрақамлари орқали айланишига эришилади.

Банкларнинг ўз ҳисобидан берадиган кредитларини давлат томонидан қайта молиялаштириш амалиёти давом эттирилади.

Шу билан бирга, 2024 йил 31 декабрга қадар Тадбиркорлик фаолиятини қўллаб-қувватлаш давлат жамғармаси томонидан хусусий пудрат ташкилотларига уй-жойлар қуриш учун ажратилган тижорат банкларининг миллий валютадаги кредитлари бўйича 24 ойдан ортиқ бўлмаган муддатга кафиллик ва компенсация тақдим этилади. Бунда, компенсация – кредит суммасидан қатъи назар, ҳар бир кўп квартирали уй-жой учун кредитнинг 5 миллиард сўмдан ортиқ бўлмаган қисми бўйича тўланади.

Кафиллик – кредит суммасидан қатъи назар, ҳар бир кўп квартирали уй-жой учун 2,5 миллиард сўмдан ошмаган миқдорда тақдим этилади. Кафиллик ва компенсациялар бериш учун майдони 70 квадрат-метрдан ошмаган квартиралар сони қурилатган уй-жойдаги жами квартиралар сонининг камида 70 фоизини ташкил этиши лозим бўлади.

Фарғонада кўп қаватли турар жойлар қурилиши шиддат билан давом этмоқда. Янги хонадонга эга бўлган фуқароларимиз уй тўйларини ўтказишмоқда. Айниқса, давлат бюджети ҳисобидан субсидия олган аҳоли Президентимизга миннатдорчилик билдирмоқда. Ишончимиз комил, жорий йилда ҳаётдан рози бўлиб яшаётган фуқаролар сони янада кўпаяди. Бу эзгу ишда вилоятимиздаги тижорат банкларининг ҳам муносиб ҳиссаси борлигидан мамнунмиз.

Зоҳиджон ДЕҲҚОНОВ,
Марказий банк Фарғона вилоят бош бошқармаси бошлиғи ўринбосари.

АДВОКАТ ТАЛАБАЛАР БИЛАН УЧРАШДИ



Фарғона юридик техникумида Ўзбекистон Республикаси Адвокатлар палатаси Наманган вилоят ҳудудий бошқармаси маслаҳатчиси, "Йил адвокати-2022" танлови ғолиби Феруза Жалилова талаба ёшлар билан учрашди.

Тадбирда суд тизимида узоқ йиллар ишлаб, соҳада етарли кўникма ва малакага эга бўлган адвокат Феруза Жалилова дастлаб суд ҳокимиятининг чинакам мустақиллиги, одил судловни амалга ошириш самарадорлиги, судлар фаолиятида очиқлик ва шаффофликни таъминлаш борасида мамлакатимизда олиб борилаётган ислохотларга тўхталиб ўтди. Сўнгра ўзи хизмат қилиб келаётган "Анушервон Одил" адвокатлик бюроси фаолияти, иш тажрибаси, нуфузли танловда ғолиб бўлишининг асосий омили ҳақида гапириб берди.

– Малакали ҳуқуқшунос бўлиб ети-

шиш учун, энг аввало, пухта билим олишга интилиш керак, – деди Феруза Жалилова. – Қолаверса, касбга жиддий иштиёқ бўлиши лозим, касб этикасига риоя қилиш, ҳуқуқий маданиятни ошириш ҳам муҳим жиҳатлардан.

Шунингдек, у бўлажак ҳуқуқшунослар ўз фаолиятида қонун ва адолат устуворлигини таъминлаши, фидойи, қатъиятли ва масъулиятни ҳис қила олиши лозимлигини алоҳида қайд этди. Талабаларнинг суд-ҳуқуқ соҳасига доир саволларига ҳаётини ва иш тажрибасига оид мисоллар билан жавоб қайтарди.

Муаттар МАҲМУДОВА.

ЭЪЛОНЛАР

FARG'ONA POLITEKHNIKA INSTITUTI

QUYIDAGI BO'SH LAVOZIMLARNI EGALLASH UCHUN TANLOV E'LON QILADI:

I. KAFEDRA MUDIRI LAVOZIMIGA:

| | | |
|---|---|---|
| 1 | Elektr texnikasi, elektr mexanikasi va elektr texnologiyalari kafedراسи | 1 |
| 2 | Neft va neft-gazni qayta ishlash texnologiyasi kafedراسи | 1 |

II. KAFEDRA DOTSENTI LAVOZIMIGA:

| | | |
|---|--|---|
| 1 | Bino inshootlar qurilishi kafedراسи | 1 |
| 2 | Buxgalteriya hisobi va audit kafedراسи | 1 |

III. KAFEDRA KATTA O'QITUVCHISI LAVOZIMIGA:

| | | |
|---|---|---|
| 1 | Elektronika va asbobsozlik kafedراسи | 1 |
| 2 | Ijtimoiy fanlar va sport kafedراسи | 1 |
| 3 | Iqtisodiyot kafedراسи | 1 |
| 4 | Neft va neft-gazni qayta ishlash texnologiyasi kafedراسи | 1 |
| 5 | Kimyo va kimyoviy texnologiya kafedراسи | 1 |
| 6 | Elektr texnikasi, elektr mexanikasi va elektr texnologiyalari kafedراسи | 1 |

IV. KAFEDRA ASSISTENTI (O'QITUVCHISI) LAVOZIMIGA:

| | | |
|---|---|---|
| 1 | Metrologiya, standartlashtirish va mahsulot sifati menejmenti kafedراسи | 1 |
|---|---|---|

Tanlovga hujjatlar qabul qilish muddati e'lon chiqqan kundan boshlab bir oy. Murojaat qilish uchun manzilgohimiz: Farg'ona shahar, Farg'ona ko'chasi, 86-uy. Telefon: (+99891-665-72-05). Kengash kotibi.

Тошлоқ тумани, Заркент қишлоғи, "Янги йўл" МФЙ, Алишер Навоий кўчаси, 1-а" уйда жойлашган "Sugar business production" МЧЖ номига берилган дума-лок муҳр йўқолганлиги сабабли

БЕКОР ҚИЛИНАДИ.

ЎЗБЕКИСТОН МУСУЛМОНЛАРИ ИДОРАСИ ФАРҒОНА ВИЛОЯТИ ВАКИЛЛИГИ

Ўзбекистон халқини, вилоятдошларимизни, ҳурматли уламоларимиз, имом-хатибларимиз ва юртимиз мўмин-мусулмонларини Ер юзидagi ислом уммати томонидан кенг нишонланаётган муборак, азизу мукаррам айём – Рамазон ҳайити билан самимий қутлайди.



Аллоҳ таолонинг марҳамати ёғиладиган ушбу барокатли, нурафшон, эл-юртимиз учун инсонпарварлик, сабр-қаноат, хайру саховат ва шукроналик тимсоли бўлган қутлуғ кунларда Сизларга, оилангизга энг олий неъмат ҳисобланмиш соғлик-саломатлик, тинчлик-хотиржамлик тилаймиз.

Меҳнаткаш ва оққўнгил халқимизнинг мўътабар моҳи Рамазонда қилган барча эзгу ният ва дуолари ижобат бўлсин!



**ЖОНАЖОН ВАТАНИМИЗНИ, АЗИЗ ХАЛҚИМИЗНИ
ЯРАТГАННИНГ ЎЗИ ПАНОҲИДА АСРАСИН!**

МУАССИС:
«Farg'ona haqiqati» va
«Ferganskaya pravda»
gazetalari tahririyati

Бош муҳаррир:
Рустам ОРИПОВ.

2021 йил 18 августда Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги Фарғона вилояти ҳудудий бошқармасида 12-001 рақами билан рўйхатдан ўтган.

Газета "Полиграф-пресс" МЧЖ босмахонасида таҳририятнинг оригинал макети асосида офсет усулида А-3 формат (8 саҳифа)да 2042 нусхада чоп этилди.
Буюртма №: 262. Босмахона манзили: Фарғона вилояти, Маргилон шаҳри, Туркистон кўчаси, 236-«б» уй.

Бизнинг манзил:
150114, Фарғона шаҳар, Соҳибқирон Темур кўчаси, 28-уй.

Бош муҳаррир қабулхонаси: (факс) 73 226-02-70.
Реклама ва эълонлар: 73 226-71-24.

Саҳифаловчи: Достонбек Холматов.
Босишга топшириш вақти: 18.00.
Топширилди: 15.00.

